



U akciji "Praznik" zbog droge privedena 22 lica

Dilere hapsilo 300 policajaca

D. SLADOJEVIĆ

SARAJEVO - Više od 300 policajaca učestvovalo je u jučerašnjoj akciji "Praznik" tokom koje su, zbog niza krivičnih djela uglavnom povezanih sa rasturanjem droge, uhapšena 22 lica.

Akciju su realizovali pripadnici Državne agencije za istrage i zaštitu (SIPA) i MUP-a Kantona Sarajevo, zajedno sa kolegama iz MUP-ova Hercegovačko-neretvanskog i Zapadnohercegovačkog kantona, te policajcima CJB Istočno Sarajevo.

Pored velike količine narkotika, pronađeni su i brojni ostali predmeti koji će biti korišteni kao dokazi, poput opreme za proizvodnju i preprodaju druge, mobilnih telefona, računarske opreme i slično.

Zaplijenjen je i novac, ali i oružje, municija i eksplozivne naprave, kao i dokumentacija, ali i jedno vozilo. Zanimljivo je da će hapšenja biti još.

"Nastavlja se rad na potpunom rasvjetljavanju i dokumentovanju krivičnih djela, kao i na pronalasku još deset osumnjičenih

lica, za kojima se traži", navedeno je u saopštenju iz MUP-a KS.

Pripadnici tog MUP-a, zajedno sa kolegama iz drugih jedinica, juče su po naredbi Kantonalnog suda u Sarajevu, a pod nadzorom Kantonalnog tužilaštva Kantona Sarajevo, na području Kantona Sarajevo pretresli stambene, poslovne i pomoćne objekte na čak 34 lokacije.

Ko je sve uhapšen, do zaključenja ovog broja "Nezavisnih" nije bilo poznato, a iz SIPA su potvrdili da je pretresa bilo i u drugim dijelovima BiH.

"U pretresima na području Kantona Sarajevo, HNK, ZHK i Istočnog Sarajeva učestvovalo je više od 300 policijskih službenika. Prilikom pretresa pronađeni su i privremeno oduzeti predmeti koji će se koristiti kao dokazi u daljem postupku", saopšteno je iz SIPA.

Nad uhapšenima je juče popodne vršena kriminalistička obrada, nakon čega bi postupajući tužilac trebalo da donese odluku o njihovom statusu.

**PRETRESALI
NA ČAK
34 LOKACIJE**

